

## 宋代周去非《岭外代答》中有关珠池的记载

### 珠池

合浦产珠之地，名曰断望池，在海中孤島下，去岸数十里。池深不下十丈，蜒人没而得蚌，剖而得珠。取蚌，以长绳系竹篮，携之以没，既拾蚌于篮，则振绳令舟人汲取之，没者亟浮就舟。不幸遇恶鱼，一缕之血，浮于水面，舟人恸哭，知其已葬鱼腹也。亦有望恶鱼而急浮，至伤股断臂者。海中恶鱼莫如刺纱，谓之鱼虎，蜒所甚忌也。蜒家自云，海上珠池若城郭然，其中光怪不可向迹，常有怪物哆口吐翁，固神灵之所护持。其中珠蚌，终古不可得者。蚌溢生于城郭之外，故可采耳。所谓珠熟之年者，蚌溢生之多也。然珠生熟年，百不一二，耗年皆是也。珠熟之年，蜒家不善为价，冒死得之，尽为黠民以升酒斗粟，一易数两。既入其手，即分为品等铢两，而卖之城中。又经数手，乃至都下。其价递相倍蓰，至于不贲。采珠在官有禁，州以廉名，谓其足以贪也。史称孟尝守合浦，珠乃大还，为廉吏之应。二十年前有守甚贪，而珠亦大熟。虽物理无验，然此以清名至今，彼与草木俱腐耳。噫！孰知孟尝还珠之说，非柳子厚复乳穴之说乎？东海广中亦有珠池，伪刘置军采之，名媚川都，死者甚多。太祖皇帝平岭南，废其都为静江军。